



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimyim@gmail.com

TAPAK 8

Yangia anidakangma :

f Tir Yimyim

Instagram tiryimyim@aolima

YouTube tir yimyim

TAPAK 7

West Indies den ODI asaya nung Siraj masayatsü

Niger sepaitemi Tir Mohamed Bazoum atsüngdokogo



VOL. XX NO. 285 (ADOK 285) DIMAPUR ROGONÜ (FRIDAY)

CHITENI (JULY) 28, 2023

₹ 5.00

Bishnupur district nung khatep; Manipur video ken o CBI nem agütsütsü akok

Imphal, Chiteni/July 27 (Agencies): Azüdokshi agi kongshia aliba Manipur state nungi alima anakshija video ka prokshiba ken o central sorkari Central Bureau of Investigation (CBI) nem agütsütsü shisadanger.

Manipur nung tetsür ana mangsa yimtung nung tashiyim amshia anir senzuba video ya bushisüngdangtsü atema CBI-i agütsü akok, ta Ministry of Home Affairs osang ka ajanga ashi.

Iba video dak sendakba nung Manipur police-i nisung ter jungnüa pua lir.

Iba mapa tamajung inyakba nung tai tonglokja alirtem rongnung tanishir, arishi küm 32 tain Pechi Awang Leikai nungi Huirem Herodas Meitei ya pua lir.

Pa ya Thoubal district nung apu, shiba video nung T-shirt sentüsü tamak ka agir liasi, ta police-i ashi.

CBI yagi Manipur nung azüdokshiba dak sendakba ken o pongu tashi bushisüngdang tenzüka lir.

Meitei nunger tebur telok kati Kuki tsür ana mangsa yimtung nung tashiyim agi May 4, 2023 nü anir senzuba video ya July 19 nü temai adoka alima rangben asüng.

Iba mapa tamajung ya Kangpokpi district nung ataloka liasi.

May 3 nungi tenzüka state nung kin balala tsüngta raratepa arudang iba ama taoksatsü tatalokba noklang aika lir, ta Manipur Chief Minister N Biren Singh-i shia liasi.

Bishnupur district nung khatep

Brehostibarnü Manipur nung aliba Bishnupur district kübok nisung telok ana tsüngta khatep, ta ketdangtsür temi ashi.

State yimtiba, Imphal nungi kilometre 50 shi pilar Phoubakchao Ikhai area nung khatepba mapang ki ka rongdoktsü.

Telok ana tsüngta khatepba mapang police tem arua parnok senshidaktsü, ta ketdangtsür temi ashi.

Iba mapang Tera Khongsangbi anasa aliba ki ka nung mi senloksü.

Iba osang züluba mapang tashinung asü-amaba osangbo mali.

Ita asem shi jakdang Manipur nung Kuki aser Meitei kin tsüngta azüdokshi tenzüka nisung 160 dak tema takum samaogo aser ano noklang aika yirua lir.

Manipur nütsüng yongzük shilem 53 shi Meitei nunger lir aser parnok ya timba Imphal Valley nung alir, aser Naga aser Kuki nunger densema tribal nisungtem ya shilem 40 shi lir aser parnok ya timba hill district tem nung alir.

'Pagala Pahar' nung kumdanga senzütsü ajungshir

Dimapur, Chiteni/July 27 (TYO): Dimapur-Kohima NH-29 nung Pagala Pahar ajanga senzütsü asoshi 'undertaking' zülutepba nung senzüsemponger temi timtem balala ajuruba indang ketdangtsür dangi tezüluba nung aruba mechi iba undertaking zülutepba tang nungi agiener, ta Deputy Commissioner, Chümoukedima, Abhinav Shivam, IAS ajanga Brehostibarnü sangdong ka nung ashi.

Ajisiuka ketdangtsür temi tang tashi nürburtem kumzüksü asoshi mera balala agitagi aser ibaji renemtsü asoshi mapang talila meshilok, kechiaser meyi mapang Pagala Pahar stretch nung senzütsü ya tang tashi lendong lir. Anungji iba lenmang ya tsünglanglen agüja aliba mera agia lapoktsü:

* Patkai apu aser Jharnapani tsüngta lenmang ya senzüsempongtsü atema lapoker, ajisiuka iba lenmang nung aonungbo khenyongi

mesenzütsüla.

- * Nürburtem lendong nungi kumzüka ayutsü mechi ketdangtsür temi mera balala agiba mapang lenmang ya shibangtsü, anungji senzüsemponger temi ketdangtsür den amalitep akatsü mepishir.
- * Iba lenmang ajanga gari senzütsü atema traffic police temi achayangtsü.
- * Tzünglu kanga sashia aruba mapang lenmang ya ajunga shibangtsü akok aser tzünglu anenba sülen lapoktsü.

Iba lenmang nung lendong nungi jenbuttsü mera agiba ano metembang asünung, aser meyi mapang asünung, iba lenmang nung jajatsü ya 'risk-free' masü. Ketdangtsür temi ashiba ama sentong yanglutsü aser akok tashi temelen danga lenmang nung jajatsü ajungshir, ta sangdong ajangasa ashi.

INDIA coalition MP temi Manipur semdangtsü

New Delhi, Chiteni/July 27 (Agencies): Opposition coalition INDIA inang parliament züngsem temi tensa kanga mejungi aliba Manipur semdangba nung tajangzük alitsü, ta West Bengal Chief Minister Mamata Banerjee-i Brehostibarnü ashi.

Assembly nung jembidang, Manipur semdangtsü asoshi laia Centre dang temelaba meshi saka magütsü, ta Banerjee-i ashi.

"INDIA nungi team kati Manipur semdangtsü. Ibajagi tajung inyaktetsü. Parnok odakjang aser tensa parnok nem ngudakjang, yangji aliba nürburtem den jembidang aser parnok ashiba

angang. Ni Centre dang ni aotsü asüngdanga zülü, saka kü nem temelaba magütsü," ta lai ashi.

INDIA alliance nungi MP telok kati Manipur ya July 29-30, 2023 anogotem semdanga yangji tang aliba tensa asadangtsü.

Ita asem jungnüa jakdang Manipur nung kin balala tsüngta azüdokshi tenzüka nisung 160 dak tema takum samaogo aser noklang aika yirua lir.

Meitei kin temi Scheduled Tribe (ST) jenjang meshiba anema hill district tem nung 'Tribal Solidarity March' ka ayongzükba sülen May 3 nü Manipur nung kin ana tsüngta rongrong tenzüka.

Temeseppa mozü anema rara sangdongtsü meranger: CM Rio



Raj Bhavan, Kohima nung July 27, 2023 nü Indian Red Cross Society Nagaland pur 36 buba Annual General Meeting amandang tangokba noksa ka nung Nagaland Governor aser IRCSN tir La Ganesan aser Nagaland Chief Minister aser IRCSN tatong tir Neiphiu Rio na den IRCSN ketdangtsürtem angur.

Dimapur, Chiteni/July 27 (TYO): Indian Red Cross Society, Nagaland State Branch (IRCSN) 36 buba Annual General meeting July 27, 2023 nü Dr Imkongliba Ao Memorial Hall, Raj Bhavan, Kohima nung mena liasi.

Iba sentong nung Nagaland Governor aser IRCSN tir La Ganesan aser Nagaland Chief Minister aser IRCSN tatong tir Neiphiu Rio nati jembia liasi.

Governor-i jembidang iba senden nung adener dang külem senso aser lokti ajungtsü mechi bendanga agütsür inyaktüsü ayongzüka liasi.

Tesüiba küm IRCSN aser yangji volunteers temi mapa tajung inyakba atema pai pelaba lemsatepa liasi.

IRCSN ajanga Myanmar kübok Solou yimtsüng nung kitsük-kirong lendong ajurur alir nem teyari balala agütsüba aser azü bendenba sentong balala ayongzükba atema tenüngsang agüja liasi.

Sorkar indang agency balala, NGOs aser nürburtem den tashi ita lungjemer parnok nükjidong atongtsü asoshi maneni inyaktüsü kanga tongtipang, ta Governor-i ashi.

Teyari nungdaka alirtem lungjemer yaritetsüsa asenok

renema alitsü nungdaker, ta ashi. Indian Red Cross Society Nagaland züngsem temi anibelem mesasai bendanga agütsür inyakba atema Governor-i pelaba lemsatep aser Red Cross indang mapa tajung maneni inyaka nungdabapur asoshi teimla angudak ama tenzüksü ajungshia liasi.

Chief Minister Neiphiu Rio, shiba IRCSN indang tatong tir ka lir, paia iba telok tenteter aser züngsem temi pei agütsü mebilemi nungdabapur jeretpereta yariba atema pelaba lemsatepa liasi.

Pai Red Cross Society dang sorkar aser CSOs tem den külemi inyaktüsü aser tanü lokti nung temeseppa mozü achi-ajemba tebilemetsü samadaktsütsü merangba nung yaritsü ayongzüka liasi.

Paisa District IRCSN tir aser züngsemtem dang nürburtem, talisa lanur aser kaketshirtem temeseppa mozü nungi pila alitsü asoshi shisatsü agütsütsü ayongzük.

State nung temeseppa mozü shibelenba aser achi-ajemba anema sorkari rara sangdongtsü meranger, ta Rio-i ashi.

Iba sentong nung Governor aser CM nati patrons tasen par toku, vice patrons ana nem konang

tetushi agütsü aser züngsem balala nem tepela temaitsü kulzüng kaket agüja liasi.

IRCSN ketdangtsür, talisa Chairperson IRCSN Abeni TCK ajanga tesüiba küm 30 tashi bendanga agütsür nürbur tenzüka atema Rio-i pelaba metetdaksü.

Business session nung General Secretary IRCSN, Akhale V Khamo-i IRCSN ajanga mapa balala inyakba indang osang agüja liasi.

Iba sentong nung MLA Dr. Tseilhoutuo Rhutso, MLA Y Mhonbemo Humtsoe, taoba legislator Dr. Nicky Kire aser H Khehovi, Chief Secretary J. Alam, DGP Rupin Sharma, Home Commissioner Abhijit Sinha, Commissioner Nagaland T.Mhabemo Yanthan aser Deputy Commissioner tem - shirnok IRCSN District Presidents lir - aser jaokertem dena liasi.

Sentong tenzüka Tsüngrem temoatsü jazüka Principal St. Joseph College, Jakhama Dr. Fr. Keduolhou George Angami-i sarasadem, Christ the King Church Choir ajanga temeja ken ka aten aser Managing Committee Member IRCSN Dr. R. Rose Chakhesang ajanga melepzüng o jembia liasi.

Manipur Governor-i assembly session temeja ka agütsü molung

Imphal, Chiteni/July 27 (Agencies): Manipur nung kin balala tsüngta mangatetep adoka tensa mejungi aliba indang jembitsü aser tangatetep kati arutsü atema Manipur Legislative Assembly indang emergency session ka jazüksü Manipur Governor Anusuiya Uikei-i molungogo.

Congress Legislature Party lenir aser taoba chief minister Okram Ibobi Singh-i anir Bodhbarnü Raj Bhavan nung Governor den ajurutepa liasi.

Opposition Congress-i Governor dang state assembly indang special session jazüksü ajungshiba ibai tasembuba liasi.

Iba senden sülen Ibobi Singh-i osangbener den jembidang Governor-i state cabinet indang

special session ka ayongzüktsü atema Chief Minister nem metetdaksütsü ta onok dang shiogo, ta ashi. State cabinet ajanga pangzüng agizükba sülen Governor-i special session jazüksü.

Iba senden nung Congress legislator temi Governor dang state nung tang tensa indang jembitsü aser teti asoshi tangatetep kati arutsü lenmang bushitsü asoshi Constitution of India indang Article 174 (1) kübok Manipur Legislative Assembly indang emergency session ka ayongzüktsü mepishia liasi.

Tang Manipur nung mepetmesü adoka aliba indang jembitsü asoshi ruling government-i special assembly session ka ayongzüktsü kechiba

nungnanger, ta Ibobi-i ashi.

Ato kilonser-i ita asem tashi Manipur mepetmemsü indang ola madoki aliba atema pai aija liasi aser Parliament nung Manipur indang asüngdangba ajak ato kilonseri langzüksüla, ta akhang.

Manipur south tsütsü arütsü alema tawa illegal Myanmarese immigrants tem aitba indang osangbener kati asüngdangba mapang, border guards temi parnok meyipa yoktsüla, ta Ibobi-i ashi.

Tang Manipur-Myanmar arütsü ya Assam Rifles temi anüker.

Manipur Legislative Assembly nung züngsem 60 lir, aser yangji Congress nungi züngsem trok lir, koba opposition party tulutiba alitsü.

Dimapur DPDB senden nung DC office tasen nung dakba indang sensak asem



July 27 nü DC Dimapur conference hall nung Dimapur DPDB mendenbuba Advisor Moatoshi Longkumer lenisüba nung senden amenba mapang tangokba noksa nung angur.

Dimapur, Chiteni/July 27 (TYO): Ita shia amenba Dimapur District Planning and Development Board senden July 27 nü DC Dimapur conference hall nung menogo. Iba seden ya Advisor, Labour Employment and Skill Development, Excise aser DPDB Dimapur, mendenbuba Moatoshi Longkumer lenisüba nung mena liasü.

Taoba senden minutes lepa reprangshiba mapang House-i Dimapur nung DC office complex tasen ka nungdakba indang sensaksema liasü. Iba dak sendakba nung August House-i, bangzüng ka yanglu aser sorkar dang maparen tembanga inyaksü atema mapang tatakük aser tanga osang meshia shiti ka züluogo.

House-isa, Dimapur nung aliba nübürtem inyaksangshi melatsü atema renewal aser licensing atema danga Transport department dang Dimapur-i ketdangsur ka yoktsü atema shiti ka zülutsü teletetba agia liasü.

Dokantem aser Dimapur nung CCTV amenoktsüba dak sendakba nung CP indang office nungi ketdangsurtemi ashiba agi, parnoki tesem 83 shimogo aser Guwahati nungi technician tem anir arua telung nung tinyaksü mapatembo inyakatokogo. CP office ajangsa, parnoki shishilembartem nem temepishiba agütsüogo, ajisiaka

kari iba ken o süoki ia magiba atema sasa bilemba lemsatepba den ketdangsurtem dang jenjang aketba CCTV inoktsü atema dokan kiburtem nem osang agütsütsü mepeshia liasü, koba ajanga district nung security tashi taitba akümtsü. Police ketdangsurtemi ashiba agi, parnoki taruba senden nung report tejangja agütsütsü ta ashi.

Dimapur nung tzümtsüng tebilemsü aliba dak sendakba nung DPDB mendenbubai taoba senden nung benokba onük dak sendakba nung RO Dimapur Thejavizo Nakhro-i House dang ashiba agi, DMC administrator aser tanga department nungi ketdangsurtem densema nisung 20 shi agi kümetetba committee ka tentetsüogo. Paisa, committee ya team ana küma lemsaogo aser parnoki tesemtem tsüngtong oa asadangogo, ta ashi. Nakhro-i ashiba agi, team tem taoba hopta nung inyaksangshi tenzükogo aser maneni inyakdar aser taruba senden nungbo osang agütsütemtsü imlar.

Maneni mamshiba telephone post tejentem agintsüba dak sendakba nung administration nungi officer incharge-i ashiba agi, service operator tem den senden ka menogo aser iba sülen tanga state nung ama wire tem longdenogo. Wire tem ya Tragopan hotel nungi City tower tashi nung ajak longdenogo aser

aser City tower nungi DC office junction tashi tang wire tem longdendar, ta lai metetdaksü.

Ki kiburtem aser dokan kiburtemi wire tem tesem balala nung atsüba ajanga Dimapur tebor ajung raksatsür ta shia Moatoshi-i, power department dang Christmas matong tsüngda iba tebilemsü bentetsü atema jenjang agitsü tuyua liasü.

DPDB mendenbubaisa, department kobaisa intashi progress reports mebenoki lir parnok dang benoktsü metetdaksüogo, ajita asünungdang sensaksem katetsü ta ashi.

Senden nungsa Advisor Tovihoto-i, Dimapur district nung kilentsü shitak maliba ya tebilemsü tulu ka lir ta ashiba den iba tebilemsü bentetsü atema sentong tajung ka yanglutsü nungdaker ta ashi. Paisa, DC office Dimapur tasen ka yanglutsüba ya nübürtemi mapang talang ka nungi yongya ataba inyakym ka lir ta ashi.

Maneni senden nung Dimapur I, II aser III A/C atema LADP 2023-24 Schemes agizük aser lokti tentet balala züngoksemsü atema sensaksema liasü.

Iba senden ya mendenbubai tepela o jembiba sülen tembang, kong pai nübürtem ajangzükdaksütsü atema züngsemtemi teka amteper inyaksü mepeshia liasü.

Kohima Press Club (KPC) inti senden menogo

Dimapur, Chiteni/July 27 (TYO): Kohima Press Club (KPC) inti senden July 27 nü APO Building, Kohima nung menogo.

Iba senden nung Club-i committee balala inyaksangshi tenzüktsü, kong Kopelo Krome lenisüba nung KPC Building Committee, Vishü Rita Krocha lenisüba nung Writing & Photography 2023 Committee atema KPC-NBOCWBB Media Fellowship aser Vincent Belho lenisüba nung Video Journalism 2023 Committee atema KPC-NBOCWBB Media Fellowship densema lir.

Item committee Convener tem dang parnok nem nongloktsüba maparentem tangsa tang benoka inyaksü mepeshia metetdaksüogo.

Press Club-isa, by-election atema Election Commission amenoktsüogo aser iba atema Narain B Sagar, election commissioner aser KC Momin o Nchumthung Odyuo na züngsem asütsü shimogo.

Senden nung Nzanbemo Khuvung lenisüba nung Audit Committee-i benokba Audit Report 2022-23 House-i agizüka liasü.

KPC tir Alice Yhoshü, shiba lenisüba nung iba dense mena liasü, lai KPC nung 2023 küm züngsem 66 züngoksema lir koba tang tashi nung züngsem timtiba asütsü ta ashi.

Maneni House-isa, Press Club aser züngsemtem ajangzüktsü atema onük balala benoka sensaksema liasü. Iba senden nung züngsem 40 shi-shilem agia liasü.

Science, Mathematics & Environment Exhibition agiogo

Dimapur, Chiteni/July 27 (TYO): Directorate of School Education aser District Education Office, Kohima na longjemer "Technology and Toys" omen dak ajemdaker July 27 nü Ura Academy Hall, Kohima nung State Level Science, Mathematics & Environment Exhibition-2023 sentong ka ayongzüka agiogo.

Iba sentong nung Advisor for School Education and SCERT, Dr. Kekhrielhoulie Yhome alakteta jaoker liasü.

Sentong nung o jembiba mapang Dr. Yhome-i, kazütsütem (toy) agi tanurtem nem tepela bener arutsü aser iba den kazütsütem tali jangjatsü atema parnok nem metetnüba tanülaka apuoktsür, ta ashi. Paisa, kazütsütem ya tanurtem nem tangazükba balala agütsütsü atema hadir tajung lir ta ashi.

Tanü lima nung science & technology koda tongtibang iba indang jembiba mapang pai, iba ajanga anogoshia libaliro tezübaba aser tali mebenjai kümdaksüogo, ta ashi. Paisa, technology ya meimchir ajangzüktsü atema tajungyimi amshitsü nungdaker ta shisem.

Dr. Yhome-i ashiba agi, Naga nungertem mango bushitepa aliba nungi talangka aruogo aser mapa tatsüka tsünga alima den meneptepa kümogo. Paisa, lokti

anitsü atema tatishitsü tajung sayuba lenir nungdaker ta ashi. Maneni pai kaketshirtem dang kecha atakzüka meyui takoba tashi sangrsangchitsü aser bilemdangtsü ajungshi.

Iba sentong nung Director, Directorate of School Education, Wonthungo Tsopoe-i o jembia liasü. Pai, mapang tatsüka tsüngda dang osang agüjaka sentong nung shilem agiba atema school tem dang kanga pelaba lemsatepa liasü. Paisa, Centre nung Ministry tetuyuba dak ajemdaker iba exhibition ayongzüka agir ta ashi.

Tsopoe-i, state nung tesayurtemi sayutsü aser kaketshirtemi anga ataba indang tesayuba yimya indang jembia aser ashiba agi, tesayur aser kaketshirtem tsüngda sensak asemtsü kanga tongtibang ta ashi. Maneni pai tesayurtem dang kaketshirtem anitetsü atema takokba tashi tajungtiba agütsütsü ayongzüka liasü.

Chief Mentor, Innovation Hub & Space Education Center, Nagaland Science Centre, Onongoto Solehol-i "Technology and Toys" onük dak ajemdaker jembia liasü.

Sentong nung Patricia Vizo-i lokti pela agizükba o jembia aser Assistant Director, School Education, Gloria Ezung-i tepela o jembia liasü.

Sazolie College nung NCC Orientation Program agi



Kohima, Chiteni/July 27 (TYO): Sazolie College, Jotsoma, Kohima nung 1st Semester kaketshirtem atema NCC Orientation Program ka ayongzüka katsüogo.

Iba sentong ya July 27 nü college auditorium nung 1 Nagaland Girls NCC Battalion Commanding Officer, Colonel Manjeet Katoch-i lenisüba nung agia liasü.

Sentong nung 1st semester nung kaketshir temtsür aser tebur parnok 128 den Principal, tesayurtem aser ANO-i shilem agia liasü. Sentong nung NCC aser iba ajanga kaketshirtem nem tajangzük agütsüba indang metetdaksü aser kaketshirtem dang alima nung lanur lokti tentet tulutiba nung shilem agitsü ajungshia liasü.

Maneni NCC, Organisation,

learning values aser state, regional aser national jenjang nung camp balala ayongzüka agiba tajangzük angubattem indang metetdakja liasü.

Group Headquarters, Kohima kübok, 1 Nagaland Girls Battalion NCC-i achayanga Nagaland kübok college 17 aser school 52 nung nung temtsür Cadet tem züngoksemer aser training agütsür.



SECURITIES AND EXCHANGE BOARD OF INDIA

CONTRACT/DEPUTATION NUNG EXECUTIVE DIRECTOR POST ATEMA APPLICATION MESHIR

Securities and Exchange Board of India (SEBI) ya securities nung sen inoktsür kumzüka ayutsü, securities market tajungba kuma ajungkettsü aser azüoktsü mechi Act of Parliament ajanga amenokba statutory regulatory body ka lir. SEBI ajanga contract/deputation nung Executive Director post ana atema India senso nungi application meshir. Application agizüktsü asoshi August 18, 2023 ya tatem alitsü.

Iba advertisement indang tali tejangjaba metetsü asoshi SEBI indang website www.sebi.gov.in. nung agüja lir.



July 27, 2023 nù Chennai nung 4buba G20 Environment & Climate Sustainability Working Group (ECSWG) senden amendang tangokba noksa nung angur.

PM-i Parliament nung mejembiba agi democracy tenüng menüksür: Kharge

New Delhi, Chiteni/July 27 (Agencies): Brihostibarnü Congress party Tir, Mallikarjun Kharge-i, Ato kilonser, Narendra Modi-i Parliament nung mejembir saka tangalen ang yimtenren onüktem jembia senzüba agi democracy tenüng menüksür, ta aitsü.

Paisa, Parliament democracy puti otsü tang ama mapang tamajungtiba pai majangshidang, ta ashi.

Kharge-isa, tesüiba anogo 85 tashi Manipur nung rarar, ajüsüaka central sorkari Manipur atema mebilemstüba ya meimchirtem atema tarak tamajung ka lir, ta ashi.

Nüburtemi tangbo item ajak rajemogo aser iba ama politics anema raratsü, ta pai ashi.

"Parliament senden tagidak aser Ato kilonseri senden nung jembitsü melen tangalen ang jembia senzür. Yamaji inyakba ajanga pai democracy tenüng menüksür. Modi sorkari aibelenbatemji opposition party tem tenüng jasatsüba agi maidoktetsü," ta Kharge-i ashi.

Paisa, Rajya Sabha nung pa o jembitsü atema BJP-i memela, ta ashi.

Parliament nung Manipur tensa atema jembitsü memelaba anema Brihostibarnü opposition züngsemtemi süoshi tanak semer longkak aita liasü.

Parliament kima osangbenertem den jembidang Kharge-i Modi aija, "Nai Parliament- democracy tekülem kidang mejembiner saka

Rajasthan nung medical colleges tasen semzüksüba sentong nungbo yimtenren o jembir," ta ashi.

Kharge-i, "Manipur arongba ya linük atema tanak mapang ka lir. Tesüiba anogo 85 tashi Manipur nung nürburtem ajepba atema sorkari kecha mebilemstüba ya meimchir atema tarak tamajung ka lir," ta ashi.

Ano külen tanga osang ka nung, Opposition teloktep-INDIA nungi lenirtemi July 29-30 anogotem nung Manipur semdanga tensa asadangtsü.

Opposition MP 20-i Manipur semdanga tensa asadangtsü, ta Lok Sabha nung Congress whip, Manickam Tagore-i osangbenertem nem metetdaksü.

SC-i ED director, S K Mishra September 15 tashi inyaktsü melar

New Delhi, July 27 (Agencies): Brihostibarnü Supreme Court-i Enforcement Directorate director, Sanjay Kumar Mishra taküm September 15 anogo tashi inyaktsü melaogo; tang Financial Action Task Force (FATF) review exercise tagidak asüba ajanga iba telemtetba agi.

Ajüsüaka Supreme Court-i, joko S K Mishra nem 'extension' magütsüsü, ta metetdaksü.

Tamalen Supreme Court-i ED Director Mishra kümsükji July 31, 2023 anogo tashi asütsü, ta metetdakja liasü.

"September 15-16 ayaterm nungi Mishra ED Director masütsü," ta Justice B R Gavai-i aniba Supreme Court bench-i metetdaksü.

Iba ken o angadangba

mapang nung Supreme Court-i Centre sorkar danga, kechiba Mishra nem maneni extension agütsüner?, Enforcement Directorate nung pa dak alaka tetemsü nübo shinga mali asü?, ta asüngdanga liasü.

Justice B R Gavai-i aniba bench-i sorkar tenüng nung jembir Solicitor General, Tushar Mehta dang, "Department nung nübo tetemsü kata mali, ta onok dang shinerba asü?" ta asüngdanga liasü. Kasa bench nung tanüngba züngsem anaji Justices Vikram Nath aser Sanjay Karol na lir.

Tushar Mehta-i bench dang, tang Financial Action Task Force (FATF) review tagidak lir, anungji tang teinyakdak ED Director kümsük atsülangtsüsüla, ta mepishia liasü.

ED tenüng nung jembir Additional Solicitor General, S V Raju-ia bench dang, "Kidanger linük kari India ya FATF indang 'grey list'-i idaktsüner, anungji tang teinyakdak ED Director maneni inyaka alitsü nüngdak," ta mepishia liasü.

Mishra ya 2018 küm November ita nung kümsük küm 2 atema ED Director shima liasü aser 2020 küm May ita nung mapa nungi anisüngzükbä küm (60) abensa. Ajüsüaka kasa küm November 13 nü Centre sorkari office sangdong ka ajanga, linük Tiri 2018 küm tetuyuba melenshia kümsük küm 2 agi küm 3 melenogo, ta metetdaksü.

Ibaji anema NGO Common Cause-i Supreme Court nung ken o benoka liasü.

LATE P. TALITEMJEN AO, IAS (Rtd.)

~28.07.2022~



Na teti talidak kidangi orr küm ka tanü abensar.

Onok mulungjang nung na teti alitsü .

- Temeim Kinungertem.



DIMAPUR BRANCH
Nyamo Lotha Road (Church Road)
Dimapur- 797112, Nagaland
Email: dimapu@bankofbaroda.com

METONGSHITSÜR

Iba ya tamalen onoki 24.07.2023 nü agütsüba Sale Notice aser **25.07.2023 anogo nung Morung Express & Tir Yimyim** nung adoktsüba sale notice dak sendakba lir. Temalen shia aliba notice nung Reserve Price Rs. 1,45,00,000.00 aser EMD senji Rs. 14,50,000.00 masü saka **Reserve Price ji Rs. 1,46,00,000.00 asütsü aser EMD senji Rs. 14,60,000.00** asütsü. Notice nung shia aliba tanüngbajibo ajak kasa dang asütsü.

Date: 27.07.2023
Place: Dimapur

Authorised Officer
(Bank of Baroda, Dimapur Branch)

Noida district nung tzümetsüng agi yimtsüng 17 kongshiogo

Noida, July 27 (Agencies): Uttar Pradesh kübok Noida aser Greater Noida nung Hindon aser Yamuna ayong nung tzü tali metsünga ayimba ajanga yim 17 nung nisung 3,100 dak tema prokshia aika shelter homes nung jenoka lir.

Tzümetsüng ajanga ali hectare 1,600 metsüngbangogo, ta ketdangsertemi metetdaksü.

Gautam Buddh Nagar District Magistrate, Manish Kumar Verma aser Noida Authority CEO, Lokesh M nati yim kar semdangba den külemi shelter homes semdangogo.

Noida district nung tzünglu maneni aruba ajanga Bodhbarnü school ajak melapokdaksü liasü. Hindon aser Yamuna ayong anasa aliba tesemtem nung tzü metsünga lir aser Noida den Greater Noida nunga tesem aika nung tzü metsünga lir.

Additional DM, Atul Kumar-i, police, administration aser PAC

züngsemtemi kümzükbä aser teyari agütsüba maparen inyakdar, ta metetdaksü.

Paisa, "Tang tehsils asem-Sadar (Noida), Dadri aser Jewar kübok yimtsüng 17 tzümetsüng agi kongshia lir. District tesem balala nung tzümetsüng agi nisung 3,355 kongshiogo aser nisung 3,137 bo tesem balala nung prokshio," ta metetdaksü.

Bodhbar nikongdang 4:00 ako tashi nung Okhla Barrage nung Yamuna ayong tzüji metre 198.25 tashi tua liasü aser Hindon ayong nunga tzüji metre 201.15 tashi tua liasü.

District tesem balala nung shelter homes 22 lir aser item shelters nung angati tanenzükdak aser chiyungtsü agütsüdar, ta ketdangsertemi metetdaksü.

Kumar-i, tang district nung aluyimba li hectare 1,590 tzümetsüng agi kongshia lir, ta metetdaksü.



28TH JULY 2023
WORLD HEPATITIS DAY

"Taküm ka, temesen ka"

- 01 ATAPISÜA MALITSÜLA. HEPATITIS TENDANGANG. IBA JAGI NÜ TAKÜM KÜMZÜKTSÜ AKOK.
- 02 ATAPISÜA MALITSÜLA. NA ASER NER KINÜ TANUR KÜMZÜKTSÜ ATEMA HEPATITIS TENDANGANG.
- 03 HEPATITIS AJANGA TEMESAN CANCER ADOK MATATSÜLA, TENDANGANG.
- 04 ATAPISÜA MALITSÜLA. NA ASER NER KIBONG KÜMZÜKTSÜ ATEMA HEPATITIS TENDANGANG.

- ▶ ALIMA NUNG VIRAL HEPATITIS TIMTEM ATEMA ASENOKI AWARENESS AGÜTSÜDI ASER IBA WARA NOKDANGTSÜ ATEMALONGJEMER RARADI.
- ▶ IBA TASHIDAK SAMATSÜTSÜ ATEMA ASENOK LONGJEMER INYAKDI.
- ▶ NAI NÜ TEMANG JENJANG KOMAKERA METETDIR, YAMAJI NA TEMANG ANEMAARSHI TALANGKAALITSÜ.
- ▶ ATAPISÜATELI TEMANG TENDANGTSÜ ASER TREATMENT AGITSÜ ATEMA HEALTH PROFESSIONALS DEN JEMBIANG
- ▶ MAPANG SHIDAK NUNG HEPATITIS TREATMENT AGIBA AJANGA NÜ TAKÜM KÜMZÜKTSÜ AKOK.

FREE DISTRICT HOSPITAL AJAK NUNG HEPATITIS B & C ANGATI TENDANGA TREATMENT AGITETTSÜ

DISTRICT HOSPITAL AJAK NUNG SERO-POSITIVES ATEMA VIRAL LOAD TENDANGTETTSÜ

OSANG TEJANGJA METETPELATSÜ ATEMA CHIEF MEDICAL OFFICER INDANG OFFICE/ANASATIBA HEALTH CENTER DEN TONGTEPRATEPANG
FOLLOW US @nhmnagaland @NagalandNhm



TIR YIMYIM YIMOBILEM (EDITORIAL)

DIMAPUR ROGONÜ, CHITENI (JULY) 28, 2023

Manipur tensa azüoktsüla

- P Tiamongba Aier

Congress-i anir Opposition aser Bharatiya Janata Party (BJP)-i Parliament nung Manipur onük jembinür ta ashir saka iba atema parnok tangatetep kati maruteti lir. Manipur nung ozüng alema inyaksangshi manenba aser lisopur tetsürtem dak tim masüba mapa inyakba tatalokbatem ajanga Centre sorkar aser Opposition külemi obang ka ser tensa süngjemdaksütsü merangtsüba sernung parnok iba onük atema olemtep meliteter. Prime Minister Narendra Modi-i tamasa Manipur onük jembiba sülen ang olemtep tenzüksü ta Opposition-i rongshir aser parnoki iba nung ajemdaker Centre anema no-confidence motion ka benokogo. Lok Sabha nung no-confidence motion benokba ya BJP-i PM Modi pukümba aser Opposition-i parnok takhangba nungi masetshiba sayur. Prime Minister nungi Manipur indang onük akhangbaji tim saka Opposition-isa Parliament nung iba onük mejembitetra takoksa ta angatetsüla. Manipur nung lendong balala atalokba ya Congress-i yimsü asüba state tem nung atalokba den kasa lir ta külen BJP-i jembia parnok jenbutsu merangba ya-a anentsüla. Parliament nung tekong merangtepba anentsü atema PM Modi-i Manipur tensa süngjemtsü indang onük jembitsüla, tetsübu tia nung aliba nübortem tasü aittsüsa mapa inyaksüla aser aibelenertem merenshitsüla. Joko iba tebilemstü khuret ya Manipur nung dang masü saka Northeast state balala nung aser ano India yimti balala nung rashia odar aser iba nung lendong tulu keta lir. Iba tensaji ajurutsüsa kümdaksüra, Centre sorkar-a süang Opposition-a süang public tejashiba matitsü. May 4 nü Manipur nung lisopur tetsür ana mangsa anir senzüba video aser tena dak tashiyim agi shi nung medemba osang prokshiba ajanga Mizoram nung aliba Meitei nunger lendongi aitsüsa tensa ka ajurua lir. Mizoram nung PAMRA ta ajaba teloki Meitei nunger kümdanga alitsü aser Mizoram toktsür aotsü sangoktsüba sülen anogo ishika lir Assam nunga Meitei nungeri Barak Valley nung aliba Mizo nunger ajak aotsü tetuyuba agütsüogo. Manipur tebilemstü ajanga Northeast tesem ajungalen mepetmesü adoka aotsü akok ta asüba ya Centre sorkari kanga junga metettsüla aser tensa tamajungba kümer tebilemstü khuret tuluba majurudang Centre-i tejak/political party mereprangi tekaratiba nung teinyaktsü mapa inyaktsü nungdaker. Külen, India Tir Droupadi Murmu-ia lisopur ka ama aser ano linük ozüngren nung tematiba menden ka ama Manipur nung atalokbatem metettsüla aser ola adoktsüla. Tir Murmu-i la ya 'rubber stamp' president ka ta dang sünüra Centre sorkari la nem tetuyuba ka magütsü tashi Manipur tensa atema ola madok nunga kecha masü. Saka lai India nung Tir inyaktsü atema tezüngzüktep agidang "Constitution aser ozüng wazüka ayutsü, kümzüksü aser puküma noktaksü" ta nangzüka lir asünung Manipur tensa süngjemtsü aser ozüngren timi ketdangsüa aotsüsa sorkar nem tetuyuba takang ka agütsütsüla. Ano, Manipur nungi dang masü saka linük nung telok balala aser kijatemi Manipur sorkar mesüra Centre sorkar dangi dang iba tebilemstü atema shiditem zülua aruba angur saka ajak madak tematiba mendenji Tir menden ya lir ta angatetta Tir Droupadi Murmu-i ola adoka arakzüksüsa la dangia shiditem zülua rongshitsü nungdaker. Aji ta mesüra Centre aser Opposition tsüngda tekong merangtep dang Parliament session tembangadoktsü aser iba sülen jibo Manipur nung dang masü saka linük kübok tesem aika nung aser talisa Northeast nung mazüoktetba tensa ajurutsü ana nung dang lir.

OLEMSABANG

AO AROGO TAMANG ASER TANGATETBA MEYIPA REPRANGSHITSÜLA

~ L. Kika Pongener

Asen Naga limai Khristan yimsu arur küm-150 ajungba jubilee-mong tesuiba küm mongogo. Yim tasen kar küma aoba, mesura Jila kar nung arogo tasen tenzüka aoba dak alaka, Ao lima litsü telungtet nung aliba lim arogotembo ajunga amai küm-100 abensaba Centennial Jubilee mongogo. Ano arogo karbo küm-150 SQC Jubilee-a mongogo aser karbo küm-150 Jubilee-mong atongtsü anasa-a alitsü sudi. Anungji, Aor arogotem tamangba jenjang aser tangatetba khen meyipa reprangshitsüba mapang kati menepogo ta bilemer. Aji oda, jokorla Aor lim arogotembo ajunga tamang nung teintet tesa küma-dokogo. Anungji Aor arogopurtembo ajunga lenla ajak nung kinu tanür ama mama ayongtsüba, mesura chi mejaker chiyungtsüba mapang masü, saka teret mejaktsüba mapang tongogo ta bilemer. Jokorla, Tsüngrem o sayuyim nunga otsü shitepa kazütsüba mapang masü-a ta bilemer. Mapang kabo sayutsüngirtema 'Sermon' ka kisung agi Ao lima arogotem ajunga sema, küm songtema sayutsüngia jajaba mapanga lia aruogo sudi. Ano mapang kabo sayutsüngirtemi laishiba tekong ka zünger England-America temesunger lima sema senzüba, Yirusalem yimti (Holy land) sema senzüba, parnok lima nung atalokba otsü ashir, aji metsüa meyoka, tebang-mechi ajak konga, nangnanga angatetba mapanga lia aruogo. Ajisuaka, joko tanübo sunday school aser child tanürtem-ia Mobile Phone nung alima ajunga nung tang kechi ataloker aji repranger asünung, joko temesunger lima atalokba otsü shiteptsüba mapang-to masü, saka Tsüngrem o temeja aser doctrinal sayutsüngitsüba mapanga ta bilemer. Tanela tekümtet kar kodaki ayipa aotsüba indang kisung masü, saka tanü putu tensa den koda liromedema, mesura koda balala bendanga alitsü (?) Tsüngremi mimchir nem ketdangsutsü nungloksüba tzü, mepong, lika-liyim shidak ketdang-asütsü, item ajak indang shisadangtsü aser sayutsü tensai bentsür aruogo.

Ano tanü Jila tulu nung lim arogo karbo tzüsenba züngsem merijang aika lir, aser Fellowship 9-10 tashi lemsar lir. Iba ama arogo tulu nung arogopur nutsüng merijang aika alidak, ashiko arogopur kibong karbo küm 9-10 nunga tenzüker katia khen danga kipoksem mesutetba-a alitsü akok. Atangji, nutsüng aika asüba agi mayimjemi, toklang tenzükerkem oda yutsür, tenzüker/tenzüklatem katia khen danga mesemdangba, mengudangba aser memetetba nutsüng/kibong karbo alitsü akok. Ano nutsüng aika asüba agi arogopurtemi toklang tenzükerkem den ajurutepe, pei tanela nungdak aser kibong nungdak lemsateptsü atema-a küm songtema nung khen danga mapang mengutetba-a alitsü akok. Aji oda, item ajakji, nutsüng onsaraba agi mayimjemi arogopurtem tanela nungdak meperidaktsüi karbo nenjemseta senzüka tokja alitsü akok. Anungji Jila tulu arogotem nung Fellowship 9-10 tashi lemsar aliba ya, lim arogo ka-ka (Independent Church) küma yokang tajungba asütsü sudi ta aiben shisadanger. Arogo tulu nutsüng aika sur mayimjemi, arogopurtem tanela nungdak mapang shitak nung meperidaktsüi atsüngzüka yokba dang nungibo, arogo tila sur arogopurtem ajunga ayung-ayunga ayimjema tanela nungdak mapang shitak-shitak nung peridaktsüba ajanga atsüngzüka yoktsü melena, mapang shidak nung anir arubajiang Tsüngrem tsüngdang sentsüh masütsüa ta aiben shisadanger. Ano iba dak alaka, tanü asen lima nung Secular-tem dang masü, Theologian-tema 'Unemployment' tebilemstü adoka-dokogo. Ashiko, iba ama tebilemstü yagi, tanü asen lima nung Para - Churches, Prayer Centers, Homes, Ministry balala aika tenzüka aor sudi ta shisadanger. Aji oda, yamala lapoka aoba ya majunga ta ashirba masü, saka joko Theology zünger mungdang aser lim arogotem nung tenzüksü mapa manguba agi itemji tenzüka aor sudi ta bilemer. Anungji Fellowship 9-10 tashi aliba ya 'Independent' arogo ka-ka küma yokra, Theology zünger tenzüksü mapa mangurtem aika Senior Pastor, Associate Pastor, Home Evangelist, Music Director etc. tenzüksü maangka angutsü aser Theologian-tem dang masü Secular-tema karbo Accountant, Clerk, Cashier, Driver, etc. mapa angutsü aser 'Unemployment' tebilemstü ya terabo pongpa-a akümtsü sudi ta bilemer. Anungji arogo tulu aser Fellowship 9-10 tashi ayutsüba iba tangatetba ya khen meyipa reprangshitsüla aser Independen arogo ka-ka küma razüka yoknung tajungba asütsü ta bilemdanger.

Ano tanü lim arogotem nung benjong-bentsü aser chiyunga-jemtepba nung arogo rongsen kanga endokba angur. Talisa, Christmas benjong amala nung chiyunga-ajemba (Feasts) kima-yimdong tazü-tapongtsü (Decorations) yamala nung senotsü kanga tali-tapong endokba angur. Kokrabangla, iba ama mapa nung talila intokba melena mokokmeiner, lajar, mata-mebensar kar-ang yariba tajungba asütsü. Ano item dak alaka, Senior Citizen, Father's day, Mother's day yamala nung senpet amshiba/alemba nung senotsü aika endokba angur. Aji oda, senpet-sa magütsü-aka, arogopurtemi arishi meshia sarasadem ka agütsüra ibaji-ang kanga temoatsü asütsü. Jokorla, asenok tamang nung teintet rogotem asünung, chiyunga-ajemtsüba aser senpet-tsüpet nung rongsen kanga meintoki, iba melena "Mission' mapa nungang endoktsüla-a ta bilemer. Anungji lim arogotem nung chiyunga-jemtepba aser senpet-tsüpet amshiba/alemba item mapatem yabo anena-adokba tajungba asütsü ta bilemer. Ano arogotem nung teintet rogotem, amitsür, sangremer, tetsütem, tebutem...parnok atema sentong tapu-tapu senotsü aika endoka ayongzüka akar, saka kanga junga shisadanga, jokorla, leper nung tetsüng külen ajemoker alirtem, kimokertem nem tesayuba tapu tapu agütsüyongjia, parnoki kong sayutsü (?) Mesura kong inyaka benshitsü (?) Anungji iba melena kijung lanur, aiur-asangur aser tila tanür atema-ang senotsü endok mesasai, tesayuba tapu balala agütsütsüla, kechiyong tarutsü aliba putuji parnok meyong lir. Anungji tanü lim arogotem aser arogopurtem tamang aser tangatetba ya khen meyipa reprangshitsü mapang kati menepogo ta kü tangatetba tazüngertem den lemsateper.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Russia nungeri Ukraine nung ano Tenla ki ka poksatsüogo



Ukraine kübok Odesa yimti nung aliba Tenla ki- Transfiguration Cathedral, Russia nunger missiles agi poksatsür aliba noksa nung angur.

July 27, 2023: Tawa Russia nunger missiles agi Ukraine nung nungshi kiojen aika raksatsüogo; item rongnung Odesa yimti nung akhidang yangluba Orthodox Tenla ki ka missiles agi poksatsüba densema lir.

Tang tesüsa Odesa yimti amakba mapang nung nisung ka asüba den nisung aika yirüogo, ta Ukraine ketdangsertemi metetdaksü.

Ukraine sepai ketdangser,

Oleh Kiper-i, "Russia nungeri Odesa nung city center amak; iba ya UNESCO kübok tekümzükba agüja lir," ta metetdaksü.

Odesa yimti nung Tenla ki tulutibaji Transfiguration Cathedral ya lir. Iba Tenla ki ya 1809 küm semzük aser Soviet Union mapang 1936 küm raksaa liasü, ajisüaka Ukraine nunger nüchiso anguba sülen iba Tenla ki yanglushia liasü.

Iba Tenla ki ya Odesa city

center nung lir aser UNESCO-i city center ya World Heritage Site ta sangdonga lir.

Tenla ki raksatsüba aija EU foreign policy tongti, Josep Borrell-i twitter ajanga, "Russia-i Ukraine samatsüsü merandang cultural sites noklang aika raksatsüogo. Transfiguration Cathedral raksatsüba ya-a Russia-i rara mapang ozüng alema inyabattem rongnung ka lir," ta metetdaksü.

Madhya Pradesh nung Khristan orphanage home ka shibangtsüogo

July 27, 2023: Madhya Pradesh state nung aliba Khristan orphanage home ka nung tanurtem Khristan yimsü dangi meyipdaksür, ta tai tonglokja shibangtsüogo.

Khristan orphanage nung aliba tanurtemji July 26 nü sorkar indang shelter home kati anir ao.

Madhya Pradesh nung child rights ketdangsertemi tawa Khristan orphanage ji mita oa liasü. Orphanage nungji tebur 38 aser tetsür 35; ajak senteper tanur 73 liasü.

Alirajpur district kübok Jobat nung aliba orphanage ji Khristan tribal group- Adivasi Sahayada Samiti-i lapokba lir.

Orphanage jagi Juvenile Justice (Care and Protection of Children) Act alema inyak, ta child rights team nungi Omark Singh-i metetdaksü.

Parnokisa, orphanage ketdangsertemi tanurtem Khristan yimsü dangi meyipdaksür, ta tai tongloksüba den külemi Khristan tanur kar ket nungi Laishiba meshizüka bener oadok.

Tribal council Tir aser Church of North India (CNI) nung züngsem, Kalpana Daniel-i, lai orphanage register asütsü aser licenses renemtsü atema mapang meshia liasü, ajisüaka ketdangsertemi orphanage ji shibangtsü, ta metetdaksü.

Lajar 30 shi sorkar shelter homes-i anir ao aser tanünga tanurtemji tsürabur dangi meyipa yok.

July 27 nü osangbener den jembidang Kalpana Daniel-i,

Khristan tribal council jagi tesüiba küm 30 tashi sensakertem yaria arur, aser iba council ya register süa lir, ta metetdaksü.

"District child welfare committee densema shingaia onok dang orphanage atema-a temeja register asütsüla, ta memetetdaksü liasü," ta lai ashi.

"Onoki registration meshitsü aser maneni mission mapa inyaksü," ta laisa shisem.

Orphanage aliba kasa moapu nungji council-isa old-age home la lapoka lir aser tang yangji tantsür-tambur 13 lir.

Taoba mapang tribal council nung züngsem, Pastor Emmanuel Dawar-i, orphanage home nung tanurtem Khristan yimsü dangi meyipdaksür, ta tai tongloksüba kheyongti tiyazü lir, ta ashi.

"Iba ya yimtenren tsütsülen nungi inyakba lir, kechiyong 2018 küm state assembly elections agiba mapang nung ruling BJP-i tribal nütsüng alima tesemtem nung menden teimbaka nung tamakok ngua liasü," ta pastor-i ashi.

"Election nung tamakok anguba atema BJP-i Khristantem nem tai tonglokja liasü aser onok nem tiyazü nung tai tonglokja amokmerener," ta Pastor Dawar-i metetdaksü.

Taküm küm tatembanglen Madhya Pradesh aser kidanger states- Chhattisgarh aser Rajasthan nung assembly elections agitsü.

Madhya Pradesh nung tesüiba küm 50 tashi anti

conversion ozüng liasü aser tesüsa 2021 küm iba ozüng ano tesashiba yanglushia liasü.

Khristan lenirtemi ashiba agi, anti conversion ozüng kübok tribal alima tesemtem nung Khristantem anema inyaker, kechiyong item tesemtem nung Khristan missionary temi shisaliok aser healthcare services agütsür.

Nütsüng million 72 aliba Madhya Pradesh state nung nütsüng shilem 0.29 dang Khristantem lir.

India nung Khristan yimsü mesamadaksütettsü: Baselios Cleemis

Thiruvananthapuram (Kerala), July 27 (Agencies): Manipur state nung Meitei aser tribal Kuki nung tsüngda maneni raraba mapang nung Kerala Catholic Bishop Council (KCBC) Tir, Cardinal Mar Baselios Cleemis-i, "Shingaia, parnoki India nung Khristan yimsü samadaksütettsü, ta mebilemstsüla," ta ashi.

Manipur nung yimjung alitsü atema Centre sorkari tangsa

ANOGO ABEN TSÜNGREM DEN

Medemertem Shimtetag

T.Ken 119:57-64

Medemertem akaba nung ajaki pelar. Asenoki parnokji nungdaker. Ken züluri Tsüngrem O ji pa medemer ta ashi. "Shirnoki ne akhüm tsübur aser shirnoki ne ozüngtem benshir, parnok ajak medemerji ni lir" (t.63). Tsüngrem O i ashiba ama, pai pa medemertem shim. Asenok temetetteper aika lir saka medemerbo ishika dang lir. Mapang ajak nungbo nai mejembiba medemer kar lir. O mejembi mapang talangka külemi alitsü akok, aji saka temulungjangbo lungjema lir. Medemer kar denbo nai metsübu jembitetba medemertem lir. Nai ne mulungjang nung khuret magütsütsü akok, aser na pa den aliba agi nübusen tajungba asür.

Tsüngrem asenok tembar tajungtiba lir. Abraham dang Tsüngrem tembar ta aja, asenoka Pa tembar asütsü akok. Yisui nütsüngtem dang ashi, "Ni nenok dang killir ta majar. Ni nenok dang tembartem ta ajar" (Yn. 15:15). Tembartemi kati ka den jembiteper. Aser asenoki Tsüngrem den jembira aser Pa O ajanga Pai asenok den jembidaksüra, Pa tsübur aser Pa ozüng ayurtem medemer asenok asütsü.

Tembarsüba tongtipang tetentangba kaji Tsüngrem O tsütsü kü tembar mulungsentsü kechi aji lir. Pai ibaji agizüker asü? Pai Tsüngrem O ji ochi ta agizüker asü? Pai Tsüngrem tsübur aser meimer asü?

Tsüngrem O ajanga ni Tsüngrem den tesendaktep shidak lira, ni nübur den tesendaktep shidak nung lir. Kü tembartem Tsüngrem tembartem alitsü. Laishiba iba dang pilaa aliba ta ajar. Laishiba O nung alibaji temoatsü taküm ka lir.

Ne medemer kümdanga shimang. Parnoki Tsüngrem tsübur asü masü? Laishiba angatetta alibaji tembar tajung ta züngshiang. Tesendaktepji asenok mapang rizünga lir. Parnokji teti tatem maka asoshi ta züngshiang.

tiyongtsüi aita inyaksüla aser atema pa (Modi) atema iba ya maongka tajungtiba lir. Asen linük temzüng nung zülua aliba Secularism ya tepor ajungtsü noksa ka masü saka tangatetba nung bangzünga lir. Centre-i ola adoktsüla aser Manipur nung yimjung atema tiyongtsüi aita inyaksüla," ta ashi.

Ernakulam district kübok Muvattupzha nung longkak aitba sentong ka nung jembidang Syro-Malankara Catholic Church nung tongti putir, Cleemis-i, "Ato kilonseri ola adoktsüla. Pai iba linük ochishia aliba indang alima den lemsateptsüla. India nung democracy lir, ta kuli sayutsü

UP nung Khristan yimsü dangi meyipdaksüba atema nisung ka apu

Ghaziabad (Uttar Pradesh), July 27 (Agencies): Uttar Pradesh kübok Ghaziabad nung Scheduled Caste aser Schedules Tribes nisungtem nem sen agüja Khristan yimsü dangi meyipdaksüba atema nisung ka puogo, ta Bodhbarnü police-i metetdaksü.

Tai tonglokja apusangji Hapur district kübok Peernagar Sudana yimdak nungi Mahinder Kumar lir, ta police-isa metetdaksü.

Modinagar area nung nisung kari ST/SC nisungtem nem sen agüja Khristan yimsü dangi meyipdaksütsü meranger, ta police nem osang metetdaksüba sülen FIR ka benoka liasü.

July 23, 2023 nü Kumar den mejangjaba nisung kar anema Modinagar police station nung FIR benoka liasü.

ACP Modinagar, Gyan Prakash-i, Mahinder Kumar

asir pa kinüngtsü nati 'Bethlehem Gospel' ta ser Trust ka lapoka lir aser parnoki sen agi sensakertem mesüzüka Khristan yimsü dangi meyipdaksütsü atema bendanglen nungi sen angur, ta metetdaksü.

"IPC kübok Arria balala aser Uttar Pradesh Prohibition of Unlawful Religious Conversion Act kübok Kumar anema ken o benok," ta Prakash-isa metetdaksü.

AO OSHI ANGAZÜKDAK:
TANÜ ANGAZÜKTSÜBA OJANG



Rizüng

(v) bendena ayu, tiptema ayu (store up)

* Egypt nung Yosefi tsük aika bendena **rizüng**.

Rizüngdak

(n) kechiserna bendena ayudak (store, warehouse).

* Nagaland police meyong prangbong injang **rizüngdak** auya.

OLONG PAITEP # 6589

1		2		3		4	5		
				6					7
		8							
9				10		11			
			12					13	
						14			
16						17			

TIPIEN

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S ___ i - (3)
- 9. Nisung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatembangtiba - (5)
- 17. Meputup - (5)

LANGTSÜNGLEN

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Majinü - (5)
- 13. Tzüma nung senzüba - (5)

OLONG PAITEP # 6587 TELANGZÜBA

TIPIEN :

- 2. Bangsemo, 6. Tiptem, 8. Jen,
- 9. Talila, 11. Aren, 12. Tzübo,
- 14. Alia, 16. Angati, 17. Odi,
- 18. Azü,
- 19. Sünglang.

LANGTSÜNGLEN :

- 1. Yipten, 3. Nüja, 4. Sangro,
- 5. Milen, 7. Tulu, 10. Laza,
- 11. Aben, 12. Tiyong, 13. Ajizük,
- 14. Aitsü, 15. Tasa, 16. Aina.



ALOKBA O WARAKLA NA SENSAXEMAR :

Alokba : Tantsü, anata Bongali nunger o ya angazüktsülaa.

Warakla : Wa kechi atema?

Alokba : Ana Bongali tsür chanu ka adopt asütsü bentsür arutsü lirji koda?

La tain akümdang ana Bongali oshiji meshi lira kechi oshi agi jembitsü?

Warakla : Oh Alokba!

- Lilir : WhatsApp

Tepela Tasoba Anogo

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

Assam-Meghalaya arrtsü atema Regional Committees senden amentsü

Shillong, July 27, 2023

(Agencies): Assam aser Meghalaya tsüngda arrtsü atema olemtep shilem tanabuba agidar aser sorkari nübortem atema tajungtiba inyakdar ta Nongpoh MLA & Ri Bhoi District Regional Committee züngsem Mayralborn Syiem-i ashi.

"Nübortem taginüba ama onoki tajungtiba inyaksü aser ibaji Regional Committee Chairman & deputy CM Prestone Tyngsong lenisüba

kübok inyaker. Onoki tangatetba tajung nung inyaker aser Regional Committee-i kechi shidir ibaji sorkar dangi abentsü" ta MLA Mayraylborn-i ashi.

"Assam nungi regional committee den onoki spot inspection mao tashi onoki kecha meshitetsü saka onoki nübortemi aginüba ama inyaksü" ta pai ashi.

"August 25 nü state anaprong nungi regional committee tem senden ka

amentsü aser August 26 nü Desh Domrea nung spot inspection asütsü" ta Mayraylborn-isa shisem.

Tanabuba shilem nung Desh Domrea, Block - II, Borduar aser Nongwah Mawtammur tesemtem dena lir. Ri Bhoi Regional Committee-i Desh Domrea nungi olemtep tenzüksü aser iba sülen Nongwan Mawtammur aser Borduar nung alitsü, ta paisa metetdaksü.

Barak Valley nung Mizo nunger kümzüka ayutsü mepishir

Aizawl, July 27, 2023

(Agencies): Mizoram Home Commissioner, H. Lalengmawia-i Assam Chief Secretary Paban Kumar Borthakur dang Barak Valley nung aliba Mizo nunger kümzüka ayutsü atema shidi ka zülüogo.

All Assam Manipuri Students' Union (AAMSU)-i Barak valley nung aliba Mizo nunger dang toktsür aotsü tetuyuba agütsüba sülen Home commissioner Lalengmawia-i Borthakur dangi shidi zülü.

"Manipur nung tesüiba ita ana tashi tensa mejungi aruba nai meteta lir. Tawa lisopur tetsür ana dak tashiyim inyakba video ka prokshiba ajanga linük nung

nübortem jashir. Mizoram nung aliba telok balalai iba tatalokba aitsüba metetdaksüogo" ta home commissioner-i shidi nung zülüa lir.

AAMSU-i Mizo nunger dang Barak Valley toktsür aotsü sangdong agütsüba sülen Peace Accord MNF Returnees' Association (PAMRA) den senden ka menogo, ta paisa ashi.

"July 22 nü ni police aser sorkar ketdangsurtem lia PAMRA tanishirtem den senden ka menogo. Idangji PAMRA-i Mizoram nung aliba Meitei nunger anema tebilemba tamajung kecha mali ta shiogo. Parnoki sangdong agütsüba Meitei nunger kümdanga alitsü

atema dang agütsü ta PAMRA-i shiogo" ta Mizoram Home Commissioner-isa ashi.

Paisa PAMRA aser AAMSU nungi teshimtet nübotem den senden ka amen aser idangji iba onük jungjunga lemsatepba indanga shidi nung shia lir.

"PAMRAjangjashitsüba All Mizoram Manipuri Association-i agizükogo. Iba indang osangji Home Department, Government of Mizoram ajanga July 22 nü sangdong agütsüba nung shia lir. Iba dak sendakba nung Barak Valley nung aliba Mizo nunger kümzüka ayutsü nü dang mepishir" ta Home Commissioner Lalengmawia-isa shidi nung ashi.

Meghalaya BJP vice-president Bernard FIR nung züngoksema lir

Tura, Chiteni/July 27

(Agencies): Tura nung July 24 nü mepetmesü adokba dak sendakba nung benokba FIR nung Meghalaya BJP vice-president Bernard Marak densema lir.

Taoba mapang telungpur aliba nungi yimden yimsüsür akümsang Bernard Marak ya FIR nung shisema aliba TMC aser BJP party nungi lenirtem rongnung ka lir.

Bernard Marak dak alia BJP lenir 15 aser TMC lenir 18 Meghalaya police indang FIR nung züngoksema lir.

Temetetsü kaji Meghalaya BJP vice-president Bernard Marak ya Garo Hills Autonomous District Council (GHADC) nung district council (MDC) züngsem ka lir.

Tura nung mepetmesü adokba dak sendakba FIR nung

pa tenüng shisema aliba indang jembiba mapang Bernard Marak-i ashiba agi, Meghalaya CM Conrad Sangma-i iba ken o ya yimden yimsüsüba ken o ka kümdaktsütsü meranger ta ashi.

FIR nung nisung 46 züngoksema lir aser parnok rongnungi tang tashi nung nisung 42 bo puogo.

July 24 nü Meghalaya kübok Tura jila nung mepetmesü tulu adokba mapang sorkar gari 20 dak tema raksaja liasü.

Longkak aitertemi Tura nung mini-secretariat dak long onloksü aser amaktsü meranga liasü.

July 25 nü Meghalaya director general of police (DGP) LR Bishnoi-i Shillong nung osangbenertem den sensaksemba mapang, July 24 nükongtsütsü Tura jila nung mepetmesü adokba ya chief

minister Conrad Sangma tepsettsü merangba ka asütsü akok, ta ashi.

Iba ken o indang jembiba mapang DGP LR Bishnoi-i ashiba agi, iba tatalokba ya jelia sentong yanglur aliba ka aser CM Conrad Sangma yirutsütsü nükjidong nung tasa asaba lir.

Lokti kati long agi aon tenzükba mapang Meghalaya chief minister Conrad Sangma office nung liasü.

Iba lendong nung security personnel aika yiruogo aser parnoki meyiper longkak aitertem dak tear gas khalokja liasü.

Iba ken o nung aija apur rongnung Meghalaya TMC lenir Richard Marak-a densema liasü.

Richard Marak ya taoba Meghalaya chief minister Mukul Sangma den kanga junga sendaktepa aliba nisung ka lir.

Assam nung sen taila lakh 2 apu

Guwahati, Chiteni/July 27

(Agencies): Assam Police team kati fake Indian currency notes (FICN) sen lakh 2 bener lia nisung ka Guwahati kübok Gorchuk tesem nung puogo.

Osang tejangja angazükba sülen meita aoba mapang nisung ka tenüng agi Babul Hussain apu, shiba ket nung sen taila ya yua liasü.

Meita aoba sülen Babul Hussain-a pua anirogo aser osang tejangjaba metettsü atema pa dang tang ken o

ashishiba mapang ka lir.

Police source kati ashiba agi, yimti nung aser tanga tesemtem nung sen taila yangluba network tulu ka alitsü akok ta temulung meleme bilemer.

Iba hopta tetenzüklen Assam Police, Special Task Force (STF)-i Guwahati nung sen taila yangluba tesem ya poteta liasü

Iba dak sendakba nung police temi Imdadur Rahman aser Rubul Ali na Hengerabari kübok Navoday Path tesem nung pua liasü.

Police temisa sen tiala menüngtsü asoshi amshiba machine dena nguteta liasü.

Police temi apuba sen taila ya sen 500 denomination nung liasü. Police temisa parnok ket nungi shitakba sen 70,500 nguteta liasü.

Item sentem ya source balala ajanga shishilembadak longdar.

Aija alirtem yagi iba sen menüngba machine amshia nüburtem ashiockja liasü, ta cource kati ashi.

Israel sepaitemi occupied West Bank nung Palestine nunger ka tepset

Nablu, Chiteni/July 27 (Agencies): Israel sepaitemi occupied West Bank nung Palestine nunger arishi kum 14 tain ka tepset, ta Palestinian health ministry ajanga ashi.

Qalqiliya yimti nung Israel sepaitem yasung adenshia rara tenzuk, ta Brehostibarnep sangdonga liasü. Yangji aliba lanurtemi sepaitemi dak long agi aon aser sepaitemi injang khaloktsü, ta yangji alirtemi ashi.

Palestinian news agency Wafa ajanga tasisang ya Faris Abu Samra ta jangjaogo. Pa dak tekolak nung akha, ta osang ajanga ashir.

Nablu tezulen Al-Ain refugee camp ka nung Palestine nunger tebur ka tepseter ghonda ishika lir iba azudokshi ya ataloker.

Israel sepaitemi ashiba agi, telungpur südi ta temolung melemi alir nisung ka aputsü parnok camp telungi ai saka sepaitemi refugee camp nung ki ka lungbang dang khatap

tenzüka Mohammed Abd al-Hakim Nada dak teko nung akha. Pa mapang tatsüka lir iba zübu agi asü.

2005 kum nungi tenzüka United Nations-i West Bank nung asü-amar züngdanga aruba nung Palestine nunger asoshi 2023 ya tamajungtiba kum asütsü, ta ketdangsür temi tekum dangtsü shia lir.

Tawa Protection of Civilian report ka nung ashiba agi, West Bank nung January aser May 29 tsüngta Palestine nungi nisung 112 tepsetba UN-i züngteta lir - 2022 kum kasa mapang atalokba dang anasü agi timba.

Israel sepaitemi tanur 41 densema Palestine nunger 409 yirutsüogo, ta report ajanga ashi.

Tesüba mapang occupied West Bank nung 2022 ya Palestine nunger nisung timtiba asüba kum liasü, iba mapang nisung 150 tepset aser yangji tanur 33 liasü.

Palestine nunger nok-nü

bena aliba telok balalai telangzüba agüja Israel sepaitem aser yangji alirtem Israel nunger dak injang khaloktsüba ajanga azudokshi tali akumer.

Taoba kum asü-amaba tali akumba mechi Palestine nunger mejungi amshiba UN expert temi aitsü, aser yangji parnok aliba ki amakba aser parnok indang ki o jen raksatsüba dena lir.

"Occupied Palestinian territory nung Palestine nunger ya tsükchir mesüra kiralongrar ama masü saka kumzüka ayuba nisung amai amshitsüla," ta UN expert temi sangdong ka nung ashi.

Brehostibarnü tanur ka kasetdak Qalqiliya ya West Bank indang northwest tsütsü lir, koba Israel indang 'separation wall' agi müketbanger lir, koba UN-i tim masü ta ashir.

Taoba mapanga iba yimti nung Israel sepaitem aser Palestine nunger tsüngta rara adoka liasü.

North Korea lenir Kim Jong Un-i Russian defence minister ajuru

Pyongyang, Chiteni/July 27 (Agencies): North Korea lenir Kim Jong Un-i Russian Defence Minister Sergei Shoigu den ajurutepogo, koba COVID-19 pandemic sülen bendang lima nungi tongtipang nisungtem den ajurutepba tang mezüngbuba alitsü.

Kim aser Shoigu na defence aser regional security dak sendakba nung kasa bilemba indang jembitep aser ballistic missiles densema nok-nü sayuba repranga liasü, ta North Korean state media ajanga Brehostibarnü ashi.

Tena tsüngta senden amenba ya DPRK-Russia tesendaktep nung century tasen nung nungdakba aser maneni tongtipang maparen nung terenlok asoshi tongtipang liasü, ta Korean Central News Agency (KCNA) ajanga North Korea dang ajaba Democratic People's Republic of Korea nungja amshia ashi.

Nok-nü aser mitkar indang hadir tasentem sayua aliba reprangtsü atema Kim-i Shoigu anir senzü, ta KCNA ajanga ashi aser noksa sayuba nunga nokdanga aliba ballistic missiles,

multi-axle transporter launchers aser ano drone tasen mesükba angu.

Shoigu-i Kim nung Russia Tir Vladimir Putin-i züluba shiti ka amokja liasü, ta KCNA ajanga ashi. Shoigu-i anir delegation ka yokba atema Kim-i Putin dang pelaba lemsatep aser Shoigu-i North Korean Defence Minister Kang Sun Nam den jembia liasü.

Shoigu-i Pyongyang semdangba ya kum asem tsüngta bendanger tongtipang nisungi meteta iba linük semdangba mezüngbuba alitsü, aser 1950-53 Korean War tezüngzüktep ka agi tembanger kum 70 ajungba mapang ka lir.

Iba benjongmung atema China nungia Chinese Communist Party Politburo züngsem Li Hongzhong densema tongtipang nisung telok kati Pyongyang semdang.

North Korean ketdangsür temi rara tembangba temaitsü linük yimtiba nung Brehostibarnü military parade tuluka ayongzüksü imlar. Korean War nungya China aser Soviet Union nati North bukuma nokdak aser United States-i

South bukuma nokdaka liasü.

Alima dang miimshiba linük nung yimsü sia aruba nung Kim ya generation tasembuba lir, aser taoba mapanga iba amala sentong nung nuclear-capable missiles densema nok-nü tasentem sayua liasü.

North Korea den tesendaktep tajung ayuba linük ishika rongnung Russia aser China ya dena lir, shirnok nuclear nok-nü aser missiles yangluba mechi international sapang nungi senzüka yuja lir.

Ukraine nung raraba nung Pyongyang-i Russia bukumer aser US inyakyim mechi Moscow-i pei security tejangraba wazüka ayutsü asoshi amak, ta tenung asener.

Ukraine nung Russian sepaitem Kim yimli-i nok-nü agütsür ta US Tir Joe Biden indang administration ajanga tai tongloktsü, saka Pyongyang-i magizüker.

Nok-nü yangluba mechi United Nations Security Council nung Pyongyang nem temerenshi tuluba agütsütsü anüolen linük temi merangba Moscow aser Beijing-i nokdanga arur.

OFFICE OF THE YAONGYIMSEN VILLAGE COUNCIL

TENÜNGSANG AGÜTSÜR



Sd/- NUNGSANGTOBA
Chairman
Yaongyimsen Village Council

Er. P. I. IMNA AO S/o Late Putimeren Ao & Late Tongjemsongla, pa tenzüka wadang nung promotion tajung ngua **Chief Engineer, PEP Kohima under NPWD** jenjang ajangzüktetba asoshi Yaongyimsen Village Council ajanga tenüngsang aser tetushi tulu agütsür.

Maneni pa taküm aser wadang ajak nung Tsüngrem-i takokma nung azükarua moajangma ta sarasademtsür.

Sd/- TONGPANG
Secretary
Yaongyimsen Village Council

Pelaba Lemsateper



ASO
08-03-1951

ASÜ
18-07-2023

Onoki teti meima aliba asür ojala **Sendongenla (Longmisa)** Shirangba anogo nungi tasüba anogo 18th July 2023 tashi temeimer kwikati nübu aser rongsen aser sarasadem agi onok iba asüku koktettsüsa nungita yariba atema kanga pelaba lemsateper.

Talisa item lokti balala dang kanga pelar.

1. Longmisa Baptist Arogo.
2. Police Baptist Church Dimapur.
3. Longmisa Village Council.
4. Dimapur Longmisa Senso Telongjem.
5. Kohima Longmisa Senso Telongjem.
6. Mokokchung Longmisa Senso Telongjem.
7. Faith Hospital Doctor, Nurses & Staff's Dimapur.

Nenek temeim taochi onoki meyiba magütsütetaka takoksang Tsüngremi nenok ajak tali moajang.

-Temeim Kinungbo, Chirnur, Semchir aser Kinungertem.

Ungma Tanujang Kin TENÜNGSANG AGÜTSÜR

Mr. Akoknükshi Longkümer aser Mrs. Imsulemla Jamir na jabaso **Dr. Supongmeren Longkümer**, Pacific Theological College SUVA, Fiji nung Associate Professor jenjang ngutetba atema asen Tanujang kin-i pelaba lemsateper. Tsüngrem ne den teti liangma.

Kin tenüng nung,

1. Lanusüngküm Tatar
2. Rongsenpokba Tatar

LONGSA MONGKA TSÜKJEMSANGBA SEMCHIR TELONGJEM

Dist. Mokokchung

Khonang Tetushi Agütsür

1. **Wt. Lipoksangla**, tebu Lt. Imzüluba Jamir, tetsü Lanurenla Lkr sorkar mapa tenzüka nungi temaba jenjang Asst. Superintendent, Directorate of Industries and Commerce, Govt. of Nagaland, jenjang tongtetba.
2. **Wb. Toshimongba**, tebu Imtitemshi Jamir, tetsü Tainla Ozükum, NSSB Result 2023 nung Junior Accounts Asst. Dept. of Treasuries & Accounts.
3. **Wb. Moyajungshi**, tebu Chongpongchiten Jamir, tetsü Achila Lkr, NSSB Result 2023 nung LDA cum Computer Asst., Dept. of PHED.

Takok tajung ngutetba asoshi semchir ajaki nenok nem tenüngsang tetushi agütsür. Tsüngremi nenok taküm mapa nung maneni moajang ta sarasademtsür.

Sd/- Noksangtemba
Tir

Sd/- Chubameren
Tezülur

METONGSHITSÜR

Tir Yimyim adok July 27, 2023 tapak 7 nung "Tenüngsang Agütsür" ta ser Akhoya Shisaluyimer Telongjem tenüng nung adokbaji LONGSA MONGKA TSÜKJEMSANGBA SEMCHIR TELONGJEM tenüng nung adoktsüba ser nung inyaker mekümdangba ajanga aibelen adoktsüba alitsü, anungji tazüngertemi yamaji metongshia agitsü mepishir. Aibelen tulu asoshi kangasa sasar.

- Yimozülur.



July 27, 2023 : Tzünglu kanga sashia aruba ajanga Pakistan kübok Lahore yimti nung tzu atsünga alidak nüburtem senzüba noksa nung angur. Pakistan nung tzünglu kanga sashia aruba ajanga Lahore aser Karachi densema yimtitem nung nüburtem tim atemer. Yimtung tzu lenmang ama kumogo aser gari nung senzürtem tzu nung senzütsüsa akumer.

World Cup: Nigeria-i goal 3-2 agi Australia kokogo



Brisbane, Chiteni/July 27 (Agencies): Tang asaya aliba tetsür World Cup nung Brehostibarnü Nigeria-i goal 3-2 agi co-hosts Australia team kokogo.

Asaya tanabuba shilem nung Osinachi Ohale aser Asisat Oshoala nati goal kaka idaktsüba sülen parnok i ba asaya kokogo aser Australia team asayamung nungi kara kara tsükatoktsü ana nung lir.

Brisbane nung asaya repranger 49,156 matsünga Australia team-i last 16 aongtsü atema maongka tajung ka magitet aser iba melena parnok lendongi ia Canada den tatemsabuba asayatsü aliba asaya ya kechi südir süaka akoktsüsa kümogo.

Kasa mapang nung Group B

nung Nigeria team temaba jenjangi tuogo aser parnok taruba asaya Ireland den asayatsü lir, shirnok tsükatokogo.

Captain Steph Catley-i ashiba agi, Australia team-i iba asaya koker lila saka asaya akoktsüsa maongka magitet.

Lai, "parnok counter kanga tajung liasü aser maongka angubatem agitetogo. Tang onok Canada atema dang bilemtsüla," ta ashi.

Asaya mezüngbuba shilem Australia-i amokbanger asayaba sülen Nigeria-i asaya akoktsü imla maliasü.

Asaya nung mezüngbuba goal ya mapang apuloktsür asayaba mapang Nigerian keeper Chiamaka Nnadozie-i ball junga memetsüetba Caitlin

Foord-i agizüka Emily van Egmond nem agütsü shibai aibelen mesüi goal idakja liasü.

Ajisüaka mapang tatsüka dang lir Nigeria team atema Uchenna Kanu-i goal ka idakja liasü. Asaya tanabuba shilem tenzüker minute 65buba nung Ohale-i par team atema tanabuba goal idakja parnok tejakdang aküm.

Maneni Barcelona nungi asayar Oshoala, shiba asaya tanabuba shilem nung aita liasü lai Nigeria atema goal tasembuba idakja liasü.

Asaya nung Australia atema Kennedy-ia mapang apuloktsür asayaba mapang minute 10buba nung goal ka idaktsü saka parnok i tasembuba goal midaktsüteti Nigeria nem asaya kokdaksü.

West Indies den ODI asaya nung Siraj masayatsü

Chiteni/July 27, 2023 (Agencies): West Indies den ODI asaya asem asayatsü lia BCCI-i, India indang squad nung Mohammed Siraj chiochtsü atema telemtetba agiogo. Pa tetsüng nung timtem aliba ajanga kümdangshia atatsü asoshi ODI nung masayai anisüngzükdaktsüsü atema telemtetba agiogo, ta board sangdong ka ajanga Brehostibarnü metetdaksü.

Team-i, arishi küm 29 tain fast bowler atema temelen meshia mali.

"Right-arm pacer ya tetsüng teloktep nung timtem lir aser kümdangshia alitsü atema BCCI medical team-i pa dang anisüngzüksü shiogo. Team-i ODI asayamung atema pa melen shinga memeshi, koba July 27 nü Barbados nung tenzüksü," ta BCCI-i ashi.

Team nungi chiokba sülen Siraj, Test nung asayar Ravichandran Ashwin, KS

Bharat, Navdeep Saini, KS Bharat aser Ajinkya Rahane nunger den kidangi meyipaogo. India-i Test asayamung 1-0 agi koka liasü.

Pa team nungi tuguatokba sülen ODI nung experience pace bowler tem mali kümogo. India team nung fast bowler tem rongnung Shardul Thakur, Jaydev Unadkat, Umran Malik aser Mukesh Kumar nunger densema lir. Par pezü rongnung Thakur (ODI 35) timbaben asayar lir aser Mukesh bo tang tashi nung ODI ka nung danga asaya mali.

Maneni Siraj ya West Indies den asayatsü aliba T20I squad nunga densema mali. ODI asayamung tembangba sülen team ana tsünga T20 pongu asayatsü.

India team August aser September ita Asia Cup asayatsü aser iba sülen October aser November ita kidang ODI World Cup asayatsü.

Sub-Junior National Basketball Championship atema asayatem shimogo



Dimapur, Chiteni/July 27 (TYO): Nagaland Basketball Association (NBA) Selection Committee-i, 48buba Sub-Junior National Basketball Championship atema tebur team nung asayar 12 shimogo.

Iba asayamung ya Puducherry nung August 3 nungi 9 tashi asayatsü. Trials ya Dimapur aser Kohima nung July 15 nü agia liasü.

Iba asayamung ya Basketball Federation of India tawabangba kübok Puducherry Basketball Association-i ayongzüko.

Nagaland team nung asayatem yamai alitsü:

1. Neilangulie Sachu (Christ King HSS, Kohima)
2. Kevinu T. Jimo (Baptist High, Kohima)
3. Tokivi Kiho (Baptist High, Kohima)
4. Khriekeduoze Yiese (Baptist High, Kohima)

5. Keduoneilie Liezeitsu (Khed Baptist Higher SS, Kohima)
6. Mesathung Tsanglao (Stepping Stones, Dimapur)
7. Vikibe Roy (Hollotoli School, Dimapur)
8. Besuve Rakho (Chokri Baptist School, Chetheba)
9. Bendangmoa Jamir (Kendriya Vidyalaya Sewak, Dimapur)
10. Niuke R. Swu (Grace Academy, Dimapur)
11. Toship Ansari (Grace Academy, Dimapur)
12. Joseph Xalxo (Don Bosco HSS, Dimapur)

State Junior boys team ya Nagaland head coach Chumbenthung Humtsoe aser team manager Rajan Nayak nati anir oa iba asayamung nung shilem agitsü, ta NBA Honorary Secretary Sentiningsang Longkumer-i sangdong ka ajanga metetdaksüogo.

Japan Open: Sen & Prannoy na quarters-i iogo; Rankireddy o Shetty natia takok angu



Chiteni/July 27, 2023 (Agencies): Tang asaya aliba Japan Open nung India nunger badminton asayar Lakshya Sen-i Brehostibarnü Japan nunger asayar Kanta Tsuneyama straight set nung koka Round of 16-i iogo.

Tebur kija asaya nungsa HS Prannoy-i külem India nunger asayar Srikanth Kidambi 19-21, 21-9, 21-9 agi koka quarters-i iogo.

Tebur tarep asaya nung Satwiksairaj Rankireddy aser Chirag Shetty natia Denmark nunger tarep Lasse Molhede aser Jeppe Bay na koka taruba round tongtetogo.

Sen-i 21-14, 21-16 agi arishi küm 27 tain Japan nunger

asayar ya ayong ayonga koka liasü. Tena tsünga minute 50 asaya. Asaya ya tetenzük nungi Sen-i amokbanger asaya aser mezüngbuba game nung pa tejakdang ser asaya tenzüka khen danga tesüleni atsüngzüka melui akok.

Tanabuba game nungbo asayar ana terabo toktepa asaya aser tena melentepa tejakdang liasü, ajisüaka 17-16 ta point ka agi Sen tejakdang akümba sülenbo tanungba point ajunga pai dang ngua asaya akok.

Tebur tarep asaya nung Rankireddy aser Shetty nati Denmark nunger tarep ya 21-17, 21-11 agi koka liasü. Parnok tsünga asaya minute

35 asaya liasü.

Mezüngbuba game nung India nunger tarep ya 3-2 ta tera agi tejakdangser tenzüker aser tesüleni khen danga atsüngzüka melui asaya 21-17 agi akok. Break sülen Denmark nunger tarep yagi kanga meranga asaya point 12-12 aküm ajisüaka iba sülen Rankireddy aser Shetty nati tena nem kecha maongka magütsüi asaya akok.

Tanabuba game nungbo Lasse Molhede aser Jeppe Bay nati kanga junga asaya tenzüker saka tenzüka ama masayateti Rankireddy aser Shetty na nem asaya amokbangdaksü aser India nunger tarep yagi ayong ayonga akok.

Tetsür tarep asaya nung Gayatri Gopichand aser Treesa Jolly nati kanga meranga asaya ajisüaka tenati Japan tsür Nami Matsuyama aser Chiraru Shida na 23-21, 21-19 agi mekoki liasü.

BILEMDANGANG

"Anibelem mesasartemi temaba jenjang tongteter."